

# QVÆSTIO MEDICA.

## QVOD LIBETARIIS DISPV TATIONIBVS MANE DISCV TIENDA.

IN SCHOLIS MEDICORVM, DIE IOVIS IV. DECEMBRIS.

M. EDMONDO CHARRIER, Doctore Medico, Præfide.

An Parisini ab Aquilone Tussi obnoxii.

1101.

**Q**VALIS ad ventriculum singultus, talis est respectu asperæ arteriæ ac pulmonum Tussis, scilicet validior motus quo spirandi instrumenta quod noxium est conantur excutere: semper est contra naturam, & omnium thoracis affectuum peræque communis; peripneumonia, pleuritidis, tabis, fluxionis; asperæ arteriæ immodicè refrigeratâ sæpe oritur profusus sine humore; sæpius fluxionem à capite habet causam, sive in ipsam ruat arteriam, fauces, linguam; sive in pulmones decumbat, nobile viscus aut obstructura, aut inflammatura, aut erosura: unde Asthma, quæ mortis meditatio est, periculosior, si nocte habet accessiones: Peripneumonia genarum rubore, pectoris mediæ occupatione, dolore obtuso, pulsus mollitie à pleuritide differens: Tabes pulmonum congelationis, pernioni, quia ab urenti frigore in manibus pedibusque fieri solet, haud absimilis; ulceris, syderationis, exsiccationis factura quàm calamitosissima: sive denique in humeros procumbat, dorsum ac latera, triplicem pleuritidis differentiam, Nothæ, Veræ, productura, quæ signis agnoscitur, febre continua, acuta, spirandi difficultate, pungente lateris dolore, atque tussi: ita quidquid asperam arteriam, pulmones, alia animæ spiramenta potius est nimio frigore offendere, violentiâ proscindere, aut denique fluxionem à capite in eas partes movere, id homines quidem reddit maximè Tussi obnoxios.

**V**NVS est ventus undique spirans à nive, glacie, aquis instar fluvii æteri, qui eò ubique gelidior est, quò origini propinquior, in qua est frigidissimus. Dividitur in quatuor principes, qui flant à totidem mundi cardinibus, Ortu, Occasu, Meridie ac Septentrionibus, quorum præcipui sunt in his regionibus, Austus & Aquilo, sub æquinoctiali circulo, Eurus atque Zephyrus: Austus à Meridie in Galliam appellit fractus & clumbis, Aquilo cum omnibus viribus: sic furit, Eurus ab ortu in Americanos & Indos, quibus Zephyrus longè est remissior. Omnes venti tractui subsunt per quem spirant; Notus in Lybia frigidus, & Aquiloni similis, calidus Solis sub iter, in Asia Græciæ circa Tropicum Cancris exoritur etiam humidus, pluvius (cæli titulam diceres) tam differt ab albis Notis siccissimis, frigidissimis, violentissimis; quorum locus originis Europa est: Ille verissimè in Græcia aures hebetat, sensus tardat, capitis dolorem movet, totum corpus afficit hebes, humidum, languidum: idem in Cyprum Etesias promittit malignos, pestilentes: quibus omnibus in Italia facillè caret elogio; ex Alpibus, subfrigidus, salubris: mari Mediterræneo furgit in Galliam Narbonensibus ac Lugdunensibus qui primum ejus sustinent impetum, pestifer, qui ea de causa cæteris Gallis vigore corporis, coloris flore, & bona valitudine cedunt plurimum, minus appetunt, amplius sitiunt: at hisce Galliæ Celticæ sinibus detritus quodam modo vix possit excitare ingentes clades, maximè si qua civitas sitis sui beneficio ab eo sit averfa.

**C**IRCVS, qui à latere flatur Aquilonis, propter Occidentem, in nostra hac Gallia nocentissimus vel ipsimet pecori, audit excoriator, circa Martium frigore occidit vitulos: idem in Gallia Narbonensi cæli tuetur salubritatem, Austri medicina est, morbosa initia pellit, verè æris scopæ: Aquilo ubique ferè in Europâ clarus est, serenus, odoriferus: Indiam & hyperbortios Æthiopes rigat imbribus assiduus: apud Germanos & Gallos gelidior: Græcis atque Italis moderatior: vincit ejus frigore (longè quippe procedit à Solis viâ) sanguis congelat, spiritus quasi præstricti torpent, vita in corde accensa subit extinctionis periculum, aspera læditur arteria, uruntur pulmones, alia respirationis instrumenta ossæ, cartilaginea, membrana immodicè refrigerantur, lacerat, scindit pulmones cum aëre haustus affatim, quoad vivimus enim necessariò spiritum è cælo ducimus, nec animus sine anima, nec anima sine spiritu & aëre teneri conservari que potest: Is respiratione os, nares, cerebrum, asperam arteriam, pulmones, cor, totum pectus implet conferunt: sic Aparthias, sanis sed gracilibus ac delicatis extremè nocet: ejus malicia amplificat aër civitatis per se crassior, fluminum vicinia, imbres in regione frequentiores, longior hyems atque autumnus, æstas perbrevis & plerumque Aquilonibus sæta, immensa cloacarum vis & latrinarum, cæni sordes in exhaustæ, proprius demum in urbe aliqua dominatus cum Cauro & Cæcia, qui cælum nubibus occæcare solet.

**O**RIENS Occidente ferventior est, Eurus Zephyro calidior; hi sunt Austro & Aquiloni accensendi, saltem in hisce tractibus: Subsolanus in ortu aridus, fatigat Æthiopes, lædit Americanos: Asia salubris, aquas reddit clariores, fructus facit odoratos, quibudam arboribus tener locum suffimenti, lætitiæ & alacritatis author est: in Italia humidus, vappam facit, nocet atra bile generata, Gallis ex se frigidior, Riphæus, æstare calidus, ex Germania, per nullum mare, nullos lacus: Favonius in Italia ficcus, ver inchoat, tenui frigore terram aperit, sudam facit cæli faciem, vesperum operitur, plenus veneris, equos facit generosos, parit flores aura Favonii: apud Gallos ex oceano, gravis nebulâ, hyemem producit, tempe-  
monum pestis, albus Notus: adeò omnia de ventis problemata intelligere oportet in regione singulari.

**L**VTETIA more clararum urbium circumdata mœnibus quæ officiant sanitati, septa fossis unde charonia quandoque aura expirat latè pestifera, civitas cæni quidem inexhausti, in palude exedificata mundum capit incolarum, ita ut gentem diceres non civitatem, quæ esse definit ubi vivitur inter ignotos, ingentem fluvium intra viscera admittit, qui ad omnes usus assumptus, calculo, alvi fluxu, melenterii morbis, tumore, abscessu, Parisienses multat, in solo collocata uliginoso, nigro, fetido, mirum in modum tenaci, fodinis lapidum, gypsi, circumeffossis unde anima crassior assiduò exhalat; auris quidem antelucanis numquam impune licet occurrere: fruitur aëre frigidissimo, humidissimo atque spississimo, Solis quidem splendore pars ejus Septentrionalis, quæ longè maxima est, liberè non recreatur: Vrbis tota recedit in Occasum & Septentriones, in quos & ad Orientem declivi sita est loco, omnibus vicis majoribus ad aliquem Aquilonum directis, Caurum patentissimo portu accipit ventis Orientalibus contraria urbis descriptione vix pervia, si Cæciam exceperis, radium vulturni aliquem jam ægrè accipit, qua parte pestis in urbe solet incipere, alioqui rarior in tanta frigoris vehementia. Itaque Parisini corporum habitudine sunt molli, humida, pectore debili, angusto, fluxionibus obnoxio, ventre ac venis ita affecti, ut sæpe earum partium pituita in pulmones exundet: accedit vita umbratilis, otium, venus, deliciarum non unum flumen, frequentes pluviae, longa & importuna hyems, æstas brevior nec fervida, sæpius Aquilonaris, ut mirum non sit vulgò grassari Pleuritidem ferè notham à pituita è cerebro expressa, venæ sectione Parisiis audacter, si ullibi, curandam; Peripneumoniam à biliosa fluxione, tabem omnis generis, pulmonum longos affectus, sed haud dubio lethales, quibus plures hereditariis tenentur, catharos vix nisi Lutetiæ subito occidentes, fluxiones in asperam arteriam & Tusses per hyemem ferè assiduas, quæ appetente vere curantur usu lactis asinini, & mutatione aëris in contrarium, calidiorem scilicet & sicciorum, ut apud Boios, ubi aquæ sulphure medicatæ vix quidquam ad curationem conferunt, nisi eundi occasionem. Quid, quod nemo Lutetiæ moritur nisi pulmone male affecto, ferèque corrupto? ut in morbis longis, in quibus sæpe causâ profligatâ, improvisus hostis jugulat.

Ergo ab Aquilone Parisini Tussi obnoxii.

### DOMINI DOCTORES DISPV TATV RI.

M. Ioannes Bapt. Moreau, Profess. Reg.  
M. Eusebius Renandot.  
M. Isaac Renandot.

M. Antonius Morand.  
M. Ioannes Haemon.  
M. Ioannes Maurin.

M. Petrus Legier.  
M. Ioannes Charrier, Profess. Reg.  
M. Ioannes Pierre.

Proponet Lutetiæ ANTONIVS DE CAËN Parisinus, A. R. S. H. M. DC. LIX.



541